

六岳登臨志

六岳登臨志卷之四目錄

西岳

華之疆域

華之總叙

華之勝地

華之神祠

華之方士

華之藝文

華之雜記





六岳登館志卷之四

楚荆門龔黃文中父編輯

西岳華山

華之疆域

尚書舜典八月西巡狩至于西華

周誥歸馬于華山之陽

周官豫州其鎮曰華山

山海經華山一曰太華太華之山削成而四方高五
千仞其廣十里

西京賦註華山對河東首陽山黃河流於二山之間
古語此本一山當河河水過之而曲行河神巨靈以
手擘開其上以足陷離其下中分爲兩以通河流
今手跡在華岳上腳跡在首陽山下

水經註曰華山中踞名天井緣客人行逕迴嶺曲而
上可高六丈餘山上微涓細水流入井中亦不沾
人出井望空視明如在室窺窓

晏子春秋君子若華山然松栢旣多矣望之盡日不
厭

九域圖華山四州之際東北曰冀東南曰豫西南曰梁西北曰雍以華山十字分之四畧乃四州也賈誼過秦論踐華爲城因河爲池

杜光庭洞天福地記十大洞天第四西玄洞周迴一千里名三玄極真之天在華州三十六小洞天第四洞西岳華山周迴三百里名總僊之天在華州華山記蓮華峯一上四十里峯頂有池生千葉白蓮華服之羽化因名華山

傳玄碑序太華之爲鎮也五岳列位而存其首三條

分方而處其中參兩儀以比德協和氣之氤氲
唐玄宗碑序踞中土西偏當土官正位是稱西岳其
氣肅其威振其行配金其辰直西前列華陽之谷
後壓華陰之郡左抱桃林之塞右產藍田之玉火
昊之下都尊收之別館也

李商隱序華岳爲西方之宗鎮協金德以主生含素
靈而養物風雲之所官府物類之所歸藏是以神
明居其宅遊仙萃其宇

李靖上岳神書嵯峨擅德肅爽凝威術制百神名雄

四岳

閭隨候賦西岳之爲鎮也大西方之爲義也多其色
白白爲五色之質其音商商爲五音之紀其味辛
辛爲五味之和其行金金爲五行之始帝則少皞
居神位則蓐收在祀歲時有擎飲之功環寶多金
石之美

楊昭儉廟記四象平興金德應收成之令八卦迭成
兌宮開潤澤之門大白明而兼海煙收涼風至而
乾坤氣爽三峰如畫群山若拱高掌遠躋出函谷

之東關少陰用事佑金秦之大野膏腴具而三川
綺錯濶澤流而入水星馳

創大用華山集序金城千里控壓三河川英岳秀太
華位焉夫太華者坐挹三公抗衡四岳終南太白
却立屏息首陽王屋不敢爭雄得太素之元精稟
金天之真氣作成萬物分主兌方上列十八洞天
則極貞爲號下踞十八水府則車箱有潭若夫仙
掌雲空蒼龍日出千山捧岳嵐氣川流翠撲客衣
經時不落已而斜陽映山蓮峰弄色如金如碧隱

丹雘青奇麗萬千不可名狀固宜降五靈玄老隱
函谷真人爲神仙一都會也

雲臺觀記華山盤峙西土翠黛插天雄麗莫狀爲天
下名山最

周洪謨廟記五岳惟西岳地形最高山勢峭拔於天
文則爲井鬼分野於地理則奠雍梁疆域

馬明卿曰字內名山惟聞其高與大耳華岳三峰壁
立四方削成迥出雲霄之上而諸峰左拱右朝前
列後屏儼然有居中制外義以少陰用事名司寇

冠疊嶂層巒名蓮花峰圖畫弗能狀之墨弗能悉
也經曰其高五千仞直下四十里登覽者不以此
兩言畫華山之奇斯得華山矣

華之總叙

復州陳文燭曰自華陰縣東行至五里鎮爲西岳廟
一名灝靈宮一名西岳行宮前有灝靈門樓旁有致
齋公署自岳廟南行十里至雲臺觀有陳希夷塑像
觀旁有甕肚峰出觀折而西有朝元洞下院東行里
許爲玉泉院有蓀山亭出院東南行數十步爲華山
神門又二十餘步過都土地祠自此入南澗口踞徑
偏仄偃仰荊棘中行數十步入五龍神祠又五里
雙石峙立是爲第一關又沿涯西登五里入張超谷

過卧山坪至方洞希夷峽又西折四十餘步大石中
分如斧劈者是爲第二關又行二里至菠蘿坪坪西
有八仙洞過坪草棘蒙道又行三里厓腹挿木布以
土行僅容足如拽道然又行里許至凉水泉其西厓
有北斗坪紫微洞遊者多不能至又行四里至青柯
坪入通仙觀出青柯坪直上至回心石又東南行皆
斜削絕壁有鐵鎖下垂每尺鑿坎挿木拽坎中左右
手互攀鐵鎖兩足互踏木杙以上凡攀進數百步爲
千尺峽又東北轉凡攀登百步爲百尺峽又東北行

二百許仍面崖而手足如前攀鎖踏杙以漸東移橫
行百步爲仙人橋又東北行里許凡攀登六十餘步
爲胡孫愁又東北行二里許凡攀登十餘步爲閻王
匾又攀登三十餘步爲閻王峽又行二里許凡攀登
七十八步爲老君犁溝又陡折行四里許至雲臺峰
峰有玉女窻神土巖仙油磧長春石室諸勝自雲臺
麓折而南行三里許爲日月巖又轉西南行二里許
爲蒼龍嶺東北有老君煉丹爐自蒼龍嶺而上行里
許遇鶴子翻身又西行至一石鎖是爲西玄門過門

至細辛坪又歷五六險始至西峯絕頂有鎮岳宮中
爲岳帝殿宮南大岡如龜背色黑而粗礪岡南有巨
壘足跡自西峯南岡穿松林迤邐南登松皆合抱森
鬱蔽日行三四里至南峯石梁又下行至希夷避詔
巖自巖底北旋繞兀中度小約又度架杖代約者三
至真武祠從祠旁上磴扶石闌轉峰角皆石板布道
闌外臨絕谷矣峰南面上下壁削亘東西皆闌也饒
壁成壙以疊石置闌面之中巖石版以入是爲朝元
洞洞外數步又巖石版垂鎖以下爲賀老避靜處去

洞沿故道東行降八九折緣磴復升巨石錯峙石分
處如輒下視如井底真不見物有兩物倚石可下其
中有安真人肉身存焉躋石磴以上至南峰頂有龍
潭旁有龍神祠自神龍祠北降而東行取道松間歷
二里許至老君洞有老君祠是爲東峯以老君嘗隱
此又名太上山北有太上泉旁有老君菴蒲池又北
有石鼓自老君祠西降行二里許又東折上升無磴
多倚木於石代之因枝痕爲梯級凡二十餘處始至
玉女峯峰頂有石龜龜旁有石壘龜上有明星玉女

祠祠前有玉女洗頭盆折而西爲玉井有玉井樓雞
初鳴可觀日出玉女峯一名中峯仙掌峰爲太華首
峰自東峰北行松林忽斷乃東峰之西北壁而玉女
峰之東北巖也巖西撐出下則縮入距東峰不遠巖
撐出處有一小松生附巖側下不見根橫幹透露巖
外無鱗皮而光滑俗傳遊者抱樹轉數匝則獲福名
爲捨身樹其巖適與仙掌峯相對峯壁溜痕淡黃微
白分爲五岐宛如左掌豎五指焉岳頂東有藏馬谷
有黃神谷有白鹿龕有玉刁三洞有碧雲洞岳頂東

南有基石峰有三公山石室有焦公巖岳頂西有羅
敷山有毛女峯有雙鳳山有太極總仙洞有車箱潭
岳頂西北有洞玄石室有壺公石室有石羊城有修
羊公石榻有肥螻穴岳頂北有御道有拜岳壇華岳
之勝又有落鴈峯白雲峯大羅峯白羊峯松檜峯玉
秀峰虎頭峯玉柱峯朝來峯文仙谷牛心谷黑山林
神姑林種藥坪石仙水簾洞正陽洞謫仙石古栢行
無憂樹駕鶴軒仙人壇上中下三宮筆塲蘆花池黃
龍潭靈應泉醴泉鎬泉

華之勝地

山四

太上

稱蓮花峰四面削成高五千仞迴鑾四合三峰嵒
嶒上廣十里鳥獸不居

三公

在岳之東南三峰巖然森秀上象三台故號三公
羅敷

唐大曆五年三官降現代宗建三官院咸平中更

爲承天觀

雙鳳

在毛女峯西相傳昔有雙鳳棲此

峯十六

蓮花

蓮花峰上有三峰上接三光中有石池二十八所
上應二十八宿蓄歲風雷為大帝之別宮神仙之
窟宅也又云一上四十里卓立五千仞上有明星
玉女之別館金天王之正廟

靈臺

在岳東北其山兩峯崢嶸四面懸絕上冠景雲下
通地脉巍然獨秀有若雲臺下有穴昔有人入此
穴東出方山行者云經黃河底上聞流水之聲焦
道廣修煉于此

毛女

在岳之西毛女字玉姜秦始皇宮人見世亂隱此
白雲

在岳之東北唐明皇妹金仙宮主修行之所舊有

白雲宮八仙洞看岳棚上竹園下竹園棗林栗林
花園藥畦磴確見在焉白雲宮側有焦真人石洞
白羊

在岳之西北五里嘗有聖燈現於巖前又有人隱
此降莫知姓名常乘白羊往來塵世後與弟子介
琰俱登仙以此號爲白羊真人有禁山錄製虎豹
狼熊符七十道行於世

甕肚

在雲臺觀前中方之上其上崛起如半甕之狀唐

玄宗欲於峰腹中鑿開元三年四字填以白石令
百里外見之扈臣力諫乃止事載開元記

玉女

一名中峯者以東峯在左西峯在右也

仙掌

在岳頂東北一名巨靈掌上有一半輪石月漢武帝
嘗於縣內立巨靈神祠

基石

在玉女峰外別一孤峰遙望峰上有方石如基石

漢武帝時衛叔卿與羣仙博戲於此

落鴈

在東岳李白登之曰此山最高呼吸之氣想通帝座恨不携謝朓驚人詩來搔首問青天耳

大羅

一名中方峯相傳王母嘗現於此舊有太清宮

松檜

在岳之西上多松檜覆以異色雲氣

玉秀

在雲臺峰外

虎頭

在玉秀峰東

玉柱

在虎頭峰東南

朝東

在玉柱峰東南
以上五峯皆聳翠陡削人跡罕至

西峯絕頂

東爲鎮岳宮宮中有岳廟其峰頂有缺空丈許大石覆蓋於上自缺口下望晦冥無際登頂四望惟東西二峰相並而南峰則截然獨出西視秦川隱約如綫北視黃河旋繞如帶南視秦嶺東視潼關諸山悉如塚垤

巖四

神土

在雲臺峰周武帝時有道士焦道廣居此

避詔

在華山西南陰不可登焦道廣賀元希陳希夷俱
養靜於此故曰避詔巖希夷手書避詔岩三字迄
今墨跡尚鮮紙獨堅白

焦公

在岳東南真人姓焦字孝龍河東人常餐白石或
分與坐客其味如芋後遭野火燒其庵隣峰人往
視之見先生危坐火中庵燒盡先生乃徐徐而起
衣服并無焦灼後數載天忽大雪人覓不見忽於
雪中單衾而臥顏色赫然如盛夏之狀老稚人常

有遇之者

日月

上有紅白二圓形宛然天成旁有道人依崖構屋
以居

峽三

希夷

在方洞右陡巖高百尺有小洞方而峽即王處一
所謂試鑿穴也中有希夷蛻骨

千尺
百尺

皆攀鐵鎖以上一名千尺撞一名百尺撞取自下
突上之義

嶺一

蒼龍

乃嶺之脊兩旁皆萬仞絕壁脊廣三尺許中突旁
殺如背色正黑列鐵柱闌鐵鎖於左右度者坐于
脊上伸兩足於前兩手執鎖以譬漸移而前脊有
兩圻先度下圻又及上圻約長五百丈相傳度嶺
時慎勿旁視視則惡風至危不可度嶺東有山神

朝虛堂

祠欽度嶺多見禱神以祈息風云

谷五

張超

後漢張超結廬之地西岸有小洞洞口有平石可坐超能為五里霧故又稱張超霧市

文仙

在蓮花峯下一名羽客菴呂真君隱居之所

牛心

昔楊震隱避居此

黃神

岳之東真人黃蘆子隱居之所

藏馬

在岳東漢武帝求仙於華山下有神馬自華山出
帝令置內棧馬不久留令人尋之見在此山谷中
石龕下故名藏馬谷其龕亦名藏馬龕東北澗中
石上馬跡尚存武帝嘗建集靈宮存仙殿望仙門
于谷中

石一

基石

在岳頂東南隅別一孤峰上遙望有石方如並榻

若棋局

坪六

卧仙

張超谷內有一石室張超蛇骨之所爲樵牧嬉戲
於其間有飛石自空來塞其穴今稱卧仙坪

種藥

真人王暉種藥於此

淡蘿

在希夷峽西里許

北斗

距涼水泉里許懸崖陡峻人不能至

青柯

在半山中入山來皆崎嶇側塞凡數百折至此則
寬衍如平岡俯視渭流如縷遠近羣巒如小垓仰
望三峰猶在天際坪旁舊有道院名通仙觀

細辛

在岳頂西南隅方圓三四畝盡是細辛古記所謂
草似帛似布今人稱西岳布是也

石室 六

洞玄

在頂之西北峯上裴真人修道五靈玄老降此

壺公

在岳之西北孤峯上石室可容十餘人有泉東北
入霧市谷東谷中即後魏道士寇謙之筭場西谷
中即修羊公石塌穿陷之所

燕公

在三公山子微隱居于此

長春

在雲臺山側大唐貞觀中有道士杜懷謙居此

裴君

在頂之西北峯上即洞玄石室昔青虛真人裴君
入石室精思至道積二十三年降五龍玄老之所
三公

其山有三峯巖然生秀上象三台以副列岳故名

石室乃仙人燕濟隱居之所嘗有黃白雲覆其上

閻王偏

閻王峽即鬼門關之義

胡孫愁

在仙人橋東北猿猴難度甚言其險也

老君犁溝

距閻王峽二里許一作老君離姑言如仙凡相隔也韓愈慟哭遺書處

泉六

太上

在老君洞北

醴

在雲菴下其水微有酒香屢招鳳飲傍有玉女神

祠

玉

在張超谷口其水色如漿因置玉泉院

凉水

距荻蘿坪七里泉出竇間青冽飲之味甚甘

靈應

在華陰縣東歲寒不冰久旱不涸溉田百餘頃

鎬

在靈應泉東其水或湧或止俗云河眼

溪一

碧雲

在碧雲洞後

池六

二十八宿 仰天 八卦 太乙

四池俱在岳頂蓮花峰上

菖蒲

在太上泉傍

蘆花

近岳西北峯後魏道士寇謨之棄其筭籌化爲葭
荻故名蘆花池

潭一

車箱

在太極總仙洞下按水府記云天下一十八處水

府華山車箱潭乃第七水府也與東海南海溫江
同皆授金龍玉簡之處

洞八

正陽

在岳之南麓真人鍾離權修煉之所

玉刁三

在岳之東王遶刁自然錢哥三人俱于此昇仙洞
有三上洞人莫能到中洞有飛石遮洞門下洞隱
居者多在此中

碧雲

在岳之東乃鄭雲叟羅隱之翟士端鄭隱四仙隱
居之所洞前爲碧雲溪

太極總仙

在岳西北毛女峯之西車箱谷內石鐫太極總仙
洞五字即小洞天之第四洞

石仙人

在南峯北面山腰雲臺峰之西登真隱訣云岳洞
深三百里中有瑤臺玉室泉則石髓金津遙望洞

門方圓丈餘爲道絕通人跡不到時出異色雲氣
洞口上有丹石間青石如丹青畫出仙人之狀冠
帔衣服無不周備高下大小宛如人形號曰石仙
人上有瀑布飛流直下三千餘丈狀如垂簾故名
石仙洞一名水簾洞

方

在張超谷洞後懸瀑瀝爲一池分流而下

八仙

在蒹葭坪西面洞厓石壁立每尺許即鑿爲小坎

客足有道士便捷者能登之

朝元

在石闌版道下深廣俱四丈高倍之純白如雪中
設三清神像供具悉備相傳下有潛龍賀師營此
四十年雖鑿石而不敢以碎石墜下墜則有聲雷

井一

玉

在蓮花峯傍中生千葉白蓮

執虛堂

八

華之神祠

廟

西岳真君

宋崇寧中改爲崇寧萬壽觀紹興中改爲報恩廣
孝觀齊阜昌中改爲迎祥觀昔司馬溫公奏天下
建置五岳真君給賜金牌永鎮洞天福地

雲臺

在華山谷口左望函谷右倚少華南對太華諸峰
黃河自北而南渭水自西而東舉目可覽蓋華山

第一觀也

華岳

漢武帝修建宋祥符中因四高士而復興

鹿園

原在竹谷嶺西宋大觀中因道士仇潤之請額修
建于華山之下

太平興國

原在閑谷內紹興中因道士焦虛請額修建于華
山之下

仙宮

唐金仙公主居此乘鶴之後勅修爲仙宮觀

宮二

素靈

按太平廣記馬周傳華山有素靈宮迺總天洞府
十洲三島神仙之所也

下方雲臺

卽雲臺觀三宮皆因羽人焦道廣建唐玄宗天寶
中命右補集賢學士衛包脩三方記上中二宮今

廢

祠四

明星玉女

在頂之中峯龜背上有玉女石室玉女雕像併玉女石馬頂上人常聞石馬夜嘶

五龍神

在南澗按道書謂希夷初隱武當有五老人來聽講易謂希夷曰吾輩池中日月龍也此地非君所棲令希夷閉目凌空御風及張目已在華山石上

又謂希夷之睡乃五龍蟄法蓋龍所授也今大和志亦有五龍神祠

真武

在避詔巖北有龜蛇在前構者靈驗

老君

中爲太上殿在東峯盡處

院三

休糧

宋太平興國中太宗召休糧道者赴闕賜經一藏

及還山寺賜號巖靜太師有休糧詩三百章傳于世

朝元洞下

朝元洞在華岳南峯上此則鑿土爲之不甚深廣故稱下院院有老君殿其前有娑羅樹數百年物結實如栗道士云灰服之以酒可愈心疾

玉泉

有山蓀亭一名會景亭水流亭下淙淙然如琴瑟環珮可聽色白如漿久服可去沉痾故名玉泉院

後石室乃希夷所鑿以習靜處院東巨石如削刻
陳古靈留題

壇二

拜岳

有二其一漢武帝拜祝之所至唐太宗修爲鎮岳
靈仙寺後名勝會院或名昭慶寺其一爲宋真宗
拜岳之所在太華驛側賜名宣澤亭有御製碑

門一

西玄

在蒼龍嶺之西其峰乃唐玄宗妹金仙公主駕鶴
飛升之地其門則玄宗尋金仙鑿石以通者也

關二

第一

俗呼五里關內有古殿上厓刻第一關三大字下
有小洞石滑不可往

第二

在希夷峽西巨石中分如門

軒一

駕鶴

在中方半路乃唐金仙宮主乘鶴昇天之處

亭一

宣澤

即宋真宗拜岳壇在太華驛側

臺一

仙人

不知所在僅見唐李益詩

橋一

仙人

在百尺峽東北執鐵鎖橫行百步危甚

古蹟 二十五

御道

在仙掌峰北乃昇岳路也漢武帝唐玄宗曾遊此
因名之今兩傍有石臼子乃當時栽欄杆用錦綉
遮護危險者也峰頂須由御道跨蒼龍臨雲臺天
井下有百尺峽自頂至青柯坪二十里青柯坪出
谷口二十里

煉丹爐

在蒼龍嶺東北牽上老子見周之衰西邁流沙至
函谷關遇令尹喜著道德經後隱于此故華山有
老君洞

石榻

在岳之西北仙谷中石室有石榻修羊公常卧于
上石榻盡穿陷

博戲石

即衛叔卿基石

巨靈掌

在岳頂東北峯上迺甲開山圖云巨靈得玄元之道與元氣一時而生混沌之師九元祖也漢武帝立祠于縣內

巨靈足蹟

在鎮岳宮南岡上深可三寸長四尺許旁鐫巨靈足三字足小掌大古人有辯

石龜

在峯頂其石似龜東西八九步南北二十餘丈兩

頭壁立

石壘

王處一華山志作石礪在石龜前穴隙如折裂闊可五寸深不可測以物投其中食頃猶聞下墜之聲相傳唐玄宗拋簡禱雨處

石鼓

在萑蒲池北嘗聞其鳴

石羊城

在張超谷西迺黃初平初起弟兄二人相遇處名

新修廣輿記

仙谷

箕場

在岳頂即蘆花池寇謨之定天元五紀之地

仙油磧

在雲臺峰壁中焦道廣每設齋醮天降油于此後
弟子洪仙等見道廣乘一物如麟往而不返後此
油亦不復見矣

試鑿穴

在雲臺峰北可高百尺其深不測穴邊有一石大

小澗狹狀如鑿出乃希夷先生蛻骨之所

白鹿龕

在岳之東昇岳路之右乃魯女生置之有飛泉滴
流女生乃山中得道之仙在華山二百年莫知所
之後忽有人于岳廟前見女生乘白鹿從玉女十
餘人相別而去

肥鱣穴

在頂西北峰上肥鱣旱神

玉女洗頭盆

在玉女祠前有石臼五枝臼中俱有水號曰玉女
洗頭盆其水碧綠澄澈旱不竭雨不溢神霧經云
明星玉女持玉漿餌之令人得神

玉女總

在雲臺南峯上有石門入丈餘直上石窟如總望
見南峯乃明星玉女之別館也

黑山林

在岳西南凡岳山上下樹木皆名爲神林人不敢
斬伐其黑山一林松檜侵天世傳岳神遊宴之處

神姑林

在黃神谷內谷東有獨坐姑姑廟松檜萬株禁人
樵採

賀老避靜處

穴石版以下有鐵鎖雙垂鎖盡處又有版道自穴
口至版道數十丈石棧插壁以當其中總鎖下至
石棧少息復總鎖至版道少息然後攀鎖西行數
十步始至避靜處有石室其版道則載于銅棧之
上銅棧插峻壁中石西有別巖上鐫全貞巖三字

填以赤色亦俯臨深壑

安貞人肉身

坐石龕不懷其衣履如生

陳希夷塑像

在雲臺觀中宋建隆二年希夷居此端拱三年徙居玉泉院皇祐二年羽化于張超谷雲臺觀中希夷像塑於希夷存日最得其貞記所謂希夷睡像黃衣束帶儼然如生

老君嘗蒲地

在太上泉下菖蒲葉細如劍脊其根每寸九節
古栢行

晉太康九年太守魏君實至西岳古廟道旁栽栢
不知幾千株以千字文爲號謂之栢行

無憂樹

在雲臺觀陳希夷菴旁其義無解

華之名士

神仙傳 五人

伯山甫者雍州人入華山中精思服食時時歸鄉里
省親如此二百年不老到人家卽數人先世以來善
惡功過有如目見又知方來吉凶言無不效其外甥
女年老多病乃以藥與之女時年已七十轉老還火
色如桃花漢武遣使者行河東忽見城西有一女子
笞一老翁使首跪受扶使者恠問之女曰此翁乃妾
子也昔吾舅氏伯山甫以神藥教妾妾教子服之不

肯今遂衰老行不及妾故扶之使者問女及子年幾
答曰妾有一百三十歲兒七十一後入華山去

西河少女者神仙伯山南外甥女也伯山南見外甥
女年少多病授以神藥女服藥時年已七十稍稍還
少色如嬰兒後亦入華山而隱

張楷字超一享公超後漢時結廬華山之下今稱張
超谷超能為五里霧學者如市又稱張超霧而起每
跨驢入長安晚即携壺荷插帶酒而歸

燕濟字子微漢明帝時人隱居華岳三公山石室服

蒼木黃精常有黃白雲覆其上後辭別交交乘雲仙去

黃初平丹溪人年少時家牧羊久而不歸其兄初起尋求歷年不見後聞道士言太華山中有牧羊兒姓黃名初平初起隨道士入張超谷中語畢問羊何在曰在山東初起往視但見白石不見羊初平乃叱石曰羊起於是白石盡變為羊數萬頭初起拜弟為師俱成列仙今張超谷西石羊城是其遺蹟

列仙傳八人

李聃字伯陽生而皓首號曰老子一曰太上老君周
衰時將西邁流沙至函谷關關令尹喜占紫氣知為
真人請著道德五千言後隱華山昭文館紀云蓮華
峯乃太上山東南峯有老君洞洞北有太上泉泉旁
菖蒲池皆老子遺跡

毛女字玉姜在華山山客獵師世世見之形體生毛
自言秦始皇宮人秦亡入山遇道士谷春教食松葉
遂不饑寒身輕如飛谷春操陽人漢成帝時仙去
壺中莫知姓名常懸壺座上日入時跳入壺中費長

房從之學令居華山西北孤峯石室中有一方石廣
丈餘壺公以茅繩繫懸空中令長房坐石下使諸蛇
蟲競來噬繩欲斷而長房坐臥自若壺中至曰子可
教矣賜子為地上主者授以劊鬼魅之術令秉竹扶
而歸長房至葛陂投扶陂中扶化龍而去

修羊公魏人在華山石室中有懸石搦卧其上石盡
穿陷常不食或取黃精食之後見漢景帝帝問公何
能公不荅化為白石羊題其背曰修羊公謝天子後
置石羊於通靈臺羊復去不知所在

衛叔卿隱華山漢武帝登岳時忽有人羽衣星冠乘雲車駕白鹿從天而降帝駕問為誰荅曰山中衛叔卿也帝曰是山中人乃朕臣忽失叔卿所在帝使梁伯推求叔卿不見但得其子度世帝曰汝父何在度世曰臣父少好仙道入華山四十餘年矣帝使梁伯度世尋求華山絕頂望見其父與數仙博戲石上但見紫霧鬱鬱數重執幢節立其後度世望而拜之叔卿曰前為太上所遣誠帝窮躋事帝強梁自貴反欲臣我不足與語是以去耳梁伯度世拜辭而歸

呼子先漢中關下卜師壽百餘歲臨去呼酒家姬令
急裝夜有仙人持二茅狗來子先持一與酒家姬因
各騎之乃龍也上華山者常於山上呼子先酒母在
此

白羊真人隱居華岳西北峯往來塵世常乘白羊因
名為白羊真人後與弟子介琰俱仙去有禁山錄及
制虎豹狼熊符七十二道行世

馬明生臨淄人從安期先生受金液神丹之方先隱
東岳後入華山仙去

逸史 九人

鍾離權咸陽人字執柄後更名覺字寂通號和谷子
一號雲房先生初遇上仙王玄甫得長生訣再遇華
陽真人傳太乙刀圭火符內丹隱居華山正陽洞又
號正陽子呂洞賓事之所著和谷子十三篇

呂巖字洞賓舊名紹先長安酒肆遇鍾離先生得道
隱居華山蓮花峯下文仙杏結菴四十年更姓姬更
名洞明號抱玄子人無識者紹興丙子中秋前一日
謂弟子劉裕之曰張翁驪母升玄待吾父矣遽臥化

裕之藏遺骸石室後數歲洞窟在泗州塔題云華州
墨客羽化三峯

葛越楚人號黃蘆子居華山之東即今黃神谷又稱
為西岳公喜治病有千里來求者或寄姓名病無不
愈能禁虎狼飛禽不敢動受術於赤松子年過八十
力舉千斤行及奔馬時大旱召出潭中黃龍使升天
降大雨一朝乘黃龍去

焦道廣居華山雲臺峯避粒餐霞常有三青鳥報未
然之事周武帝親詣山庭臨軒問道因於谷口置雲

臺觀後弟子于洪仙等見道廣乘一物如麟往而不
返

王暉居華山有驅虎豹之術每種黃精即駕虎豹以
耕今種藥坪是也常乘虎豹具鸛鶴之屬策以竹杖
如人乘驪馬之狀著九字詩百餘言人莫解其意後
冲舉不復見

陳搏字圖南號扶搖子亳州真源人後唐明宗聞先
生名召至長揖不拜賜號清虛處士仍賜宮女三人
先生表謝畧云趙國名姬漢度叔女昔居天上今落

人間不敢納於私家謹用安之別館臣茲送彼復歸
清禁贈宮女詩云雪為肌膚玉為顙多謝君王送到
來處士不生巫峽夢空煩雲雨下陽臺以書付宮使
逸去武當九室巖二十餘年撰指玄篇入室還丹詩
鈞臺集傳世後移居華山雲臺觀閉門臥累月不起
周世宗召至拜諫議大夫固辭賜號白雲先生還山
乘驢遊華陰聞宋太祖即位大咲曰天下自此定矣
太宗召至甚重之仍拜諫議不受詔曰華山隱士陳
搏晦跡丘樊棲心巖穴跌宕世表涵味道腴徃在周

朝物色幽遐嘗應鶴板之詔終遂鴻冥之心自爾以
來多歷年所今復言迂高迹來儀朕度不有嘉名曷
彰清範可賜號希夷先生并賜龜鶴鞍馬束帶還山
後遣使齎賜茶藥等物令守令安車迎先生其表謝
云丁寧溫語書一札之細書曲軫宸恩賜萬金之良
藥臣明時間客唐室書生克道昌而優容許由漢世
盛而善存四皓嘉邇之士何代無之况臣敗荷作服
脫簪為冠體有青毛足無草屨倘臨軒陛貽笑聖明
願回天聽得隱此山睚世優賢不添前古數行恩詔

徒煩再鳳啣來一片野心已被白雲番住端拱初化
形蓮花峯下張超谷中後有中使至我眉山見先生
語華山事忽失所在

丁少微道士居華山善服氣引年與陳搏齊名然少
微志尚清潔搏嗜酒放曠雖居室密邇未嘗往來宋
太宗召至少微以金丹巨勝玄芝等獻上留數月遣
還

王達字白遼都陽人居華岳東能治病禁邪魅有竹
篋令弟子錢哥以九節竹拄擔之十餘年未開夜行

見有巨火前導後至巖穴中見友人刁自然蓬開竹
篋出五合竹簣三枚三人同鼓之刁曰卿不可久在
塵寰玉刁錢哥遂登仙今華山有玉刁上中下三洞
在焉

杜子華不知何許人信州李虞與楊綬同遊華山偶
至一小洞入不三四步路極平坦二人歎窮其盡處
行四五里擬回又不可更勉進二三里至洞口時已
晡矣川巖草樹不似人間道傍有耕者見二人甚驚
異曰卽君何得至此又行二里餘有佛堂紫衣人出

延虞等至一府署自言曰我姓杜名子華避亂遇仙
居此數百年矣君能住否二子有難色歎燕累日各
贈銀器遣人導之臨別囑曰無漏於人間後虞等往
尋其洞不復見

華山志 三人

鄭遨羅隱之翟士端鄭隱四仙同居華山碧雲洞遨
字雲叟南燕人聞華山五鬣松凝脂千歲能延年來
居華山唐天成中以拾遺召不起賜號逍遙先生隱
之新塗縣玉笥山玉梁觀道士來居華山晉天福中

賜號希夷先生士端字表正齊人宋祥符中召不起
尸解而去隱字明處兗州奉符人左臂有黑子如北
斗祥符中真宗祀后土召赴行在賜號真晦先生及
御製歸山歌

帝節杜陵人後魏時棄官謁趙法師入華山號陽子
避穀餌黃精撰三洞儀序老子易論周武帝賜號精
思法師

裴清虛真君居西岳洞玄石室精思至道積二十三
年感五靈玄老降臨

道編 一人

王處一東牟人師事重陽真人得正法金世宗章宗
屢召問道禮遇甚隆嘗居華山自號蓮峰逸士著華
山志及雲光集行世元至元初贈正陽體玄真人

逍遙墟 一人

鐵拐先生姓李實本魁梧早歲聞道修真巖穴時李
老君與完丘先生嘗臨山齋誨以道教一日先生將
赴老君之約於華山囑其徒曰吾魄在此儻游魂七
日不返若南可化吾魄也徒以母疾迅歸六日化之

先生至七日果歸失魄無依乃附一餓芋之尸而起
故形跛惡非其質矣

異聞錄 三人

成公興真人不知何許人後魏寇謀之在華山定天
元五紀籌籌有差真人假為貨客狎狂而來觸其筭
籌其數始合

焦孝龍河東人隱華岳東南今稱焦公巖常餐白石
或分與坐客其味如芋後遭野火燒其菴隣華人往
視之見孝龍危坐火中菴燒盡孝龍徐而起衣不焦

灼後數載天忽大雪孝龍單衾卧雪中顏色赫然如
盛夏時其狀貌或老或少變態不常

常仙翁入華山得道唐玄宗大曆中夢人謂曰西岳
有皇帝壇訪而封之當受福即詔御史常君訪求至
山下食店中遇一老父姓常因問常君祖代官諱常
君曰我高祖諱某好道隨時入此山不返老父曰吾
即某也有二子爾即吾少子之曾孫也爾祖母與爾
二祖姑俱在山中明日引常君入山谷見其祖母及
二祖姑又引常君至蓮花中峰西南上指示古壇常

君回奏太宗獲尋老父居處遂失所在

劇談錄 二人

杜懷謙唐真觀中居華山石室偃息累月不動斷穀不食好吹長笛令人多買笛至室偶一吹之即投巖下號長春先生

劇平天寶中居齊魯間善吐納能夜中視物不用燈燭安祿山在范陽厚幣致于門下平見祿山左右常有鬼物數十殊形詭狀持鑪執盞以為導從平心異之謂其必謂大僚及祿山朝覲與平俱祿山行至華

陰謁天師投龍於西岳平見二青衣童子乘虛而至
所衛祿山魑魅皆棄鑪投蓋狼狽而走因知祿山為
邪物所輔必不以正道終及祿山歸范陽平逃入華
山而隱

華之藝文

詩

扈從

沈佺期

西岳何穹崇壯哉信靈造諸巖皆峻秀中峯特美好
旁見巨掌存勢如拓東倒頗聞首陽去折北黃河道
磅礴壓洪源巍哉壯清吳雲泉紛亂瀑天磴砢砢抱
子先呼其巖宮女世不老下有府君廟歷載傳洒掃
星明應天遊十月戒豐鎬微末忝閑從兼得事蘋藻
宿心愛茲山意欲拾靈草陰壑已永閉雲竇絕探討

芳日期再來回策思方浩

望岳

祖詠

西入秦關口南瞻驛路連彩雲生關下松樹到祠邊
作鎮當官道為樵據大川蓮峯遙上處彷彿有神仙

望岳

杜甫

西岳峻嶒竦處尊諸峯羅立似兒孫安得仙人九節
杖拄到玉女洗頭盆車箱入谷無歸路箭括通天有
一門稍待秋風涼冷後高尋白帝問真源

過華陰

王昌齡

雲起太華山雲山互明
藏東峯始含暈了了見松雪
羈人感幽拙窗映轉奇絕
忻然忘所疲永望吟不輟

望岳

衛光

太華五千尋重岩才沓起
勢飛白雲外影倒黃河裏
上有千葉蓮服之久不死
山高採難得歎息徒仰止

詠岳

劉禹錫

洪鐘作高山天氣鼓其素
依然神功就峻拔在寥廓
靈蹤露持衣殺氣見稜角
凡木不敢生神仙聿來託
天資帝王宅以我為關鑰
能令下國人一見換神骨

高山固無限如此方爲岳大夫無特達雖貴猶碌碌

送丹丘子

李白

西岳崢嶸何壯哉黃河如綵天際來黃河萬里觸山
動盤渦谷轉秦地雷榮光休氣分五彩千年一清聖
人在巨靈咆哮擘兩山洪波噴流射東海三峯却立
如歎摧翠崖丹谷高掌開白帝金精運元氣石作蓮
花雲作臺閣道窈冥人不列中有不死丹丘生明星
玉女備洒掃麻姑搔背指瓜輕我皇手把天地戶丹
丘談天與天語九重出入生光輝東海蓬萊復西歸

玉漿倘惠故人飲身騎茅龍上天飛

雲臺峰

西岳蓮花山迢迢見明星素手把芙蓉虛步躡太清
霓裳曳廣帶飄拂升天行邀我登雲臺高揖衛叔卿
恍惚與之去駕鶴凌紫冥

過華陰

崔 影

嵒嵒太華倚咸京天外三峯削不成武帝祠前雲欲
散仙人掌上雨初晴河山北枕秦關險驛路西連漢
時平借問路旁名利客無如此處學長生

望岳

劉長卿

客路瞻太華三峯高際天
夏雲亘百里合沓遙相連
好鳥飛半腹太陽在其巔
翠微闌上近瀑布林間懸
變此衆容秀能令西望偏
徘徊忘暝色決瀉成陰煙
曾是朝百靈亦聞會群仙
瓊漿豈易挹毛女非空傳
彷彿仍佇想幽竒如眼前
金天有清廟松栢隱蒼然

望岳贈友

陶翰

作吏到西岳乃觀三峯壯
削成元氣中傑出天漢上
如有飛動色不知清冥狀
巨靈安在哉厥跡猶可望

方此碩行旅未由歸仙裝朦朧記星壇明滅數雲嶂
良友垂真契宿心所微尚敢投歸山吟霞徑一相訪

雲臺觀

孟郊

華岳獨靈異草木銜新鮮山盡五色石水無一色泉
仙酒不醉人仙芝皆延年夜聞明星館時韻女蘿絃
敬茲不能寐焚栢吟道篇

雲臺觀

錢起

秋日西山明勝趣引孤策桃源數曲盡洞口兩峯坼
還從罔象求忽得仙靈宅霓裳誰之子霞酌能止客

華山志
殘陽在翠微
携手更登歷
林行拂煙雨
溪望亂金碧
飛鳥下天窓
哀松際雲壁
猶尋玄蹤遠
窅入寥天寂
顧言葛仙翁
終年煉玉液

玉井

韓愈

太華峯頭玉井蓮
開花十丈藕如船
冷比雪霜甘比蜜
一片入口沉痾痊
我欲求之不憚遠
青壁無路難
黃緣安得長梯上
摘實下種七澤根
揀連

老君犁溝贈張籍

洛邑得休告
華山窮絕陁
倚巖睨海眼
引袖拂天星

日駕此迴轡金神所司刑泉紳拖修白石剡攢高青
磴薜濕奉跼梯甍甍伶俜悔狂已昨齒垂誠乃鑽銘

蓮峯歌

賈島

錦礫潺湲玉溪水曉來微雨藤花紫冉冉山鷄紅尾
長一聲樵斧驚飛起松刺梳空石錯處煙香風軟人
參藥陽厓一夢伴雲根仙茵靈芝夢魂裏

玉女洗頭盆

玉女洗頭盆孤高不可言瀑流連岳頂河注華山根
絕雀林藏鷗無人境有猿秋蟬繞過雨石上古松門

西峯絕頂

王維

西岳出浮雲，積翠在太清。
連天凝黛色，百里遙青冥。
白日爲太寒，森沉陰城昔。
聞軋坤開變，化生巨靈。
右足踏方山，左手推削成。
天地忽開折，大河注東溟。
遂爲西岳峙，雄雄鎮秦京。
大君包覆載，至彼被群生。
上帝重昭告，金天思奉迎。
人祇望幸久，何獨禱云亭。

岳廟

李益

陰山臨古道，廟閉空山碧。
落日春草中，攀芳薦瑤席。
明靈達精意，彷彿如不隔。
微雨神降時，回風入松栢。

入華山經仙人壇

三考西岳下官曹少休沐久負青山諾今還獲所款
常聞玉清洞金簡受玄籙夙駕昇天行雲霞恣遊宿
平明矯輕策捫石入空曲真人古石壇苔遠青瑤局
陽挂凌煙紫陰蘿冒水綠隔山聞丹經懸泉注明玉
前驚羽人會白日天居肅聞我將致辭笑之自相目
竦身雲遂起仰見雙白鵝墜其一紙書文字類鳥足
視之了不識三反又三復歸來問方士舉世莫能讀
何必若蜉蝣然後為跼促鄙哉官遊子身志俱降辱

再往不及期勞歌扣山木

贈華頂道士

項斯

仙人掌中住生有上天期已廢燒丹處猶多種杏時
養龍於淺水寄鶴在高枝得道復無事相逢盡日碁

寄華山鄭隱者

張籍

獨坐三峯下年深學鍊丹一間松葉屋數片石花冠
酒待山中飲琴將洞內彈開門移遠竹翦草出幽園
荒壁通泉架晴厓曬藥壇寧知騎鶴客長向白雲看

西峯絕頂

鄭谷

峭仞聳巍巍晴嵐染近幾孤高不可狀圖寫盡應非
絕頂神仙會半空鸞鶴飛雲臺分遠靄樹谷隱斜輝
墜石連村響狂雷發廟威氣中寒渭陽影外日樓微
雲封蓮花落泉橫露掌飛乳懸危磴滑熱徹上方稀
遊行生真趣逍遙息世機野花明澗路春蘚滋松圍
僻洞時聞磬群僧晝掩扉他年洗塵骨香火願相依

送人祀岳

姚合

報功嚴祀典寵路下明虔酒氣飄林嶺香煙入杳冥
樂清三奏備辭直百神聽衣拂雲霞濕詩通水石靈

何因逐羈騎暫得到巖高

白雲峰

張鉞

獨上上方上高立聊稱心氣衝雲易黑影落縣多陰
有雪草不死無風松自吟會當求大藥他日後追尋

送西戴入華山

顧非熊

古木亂重重何人識去踪斜陽收萬壑圓月上三峯
雲裏泉縈石懸間鳥下松惟應採藥客時向北相逢

贈華山隱者

方干

少微夜夜當仙掌更有何人在此居花月舊交看浴

鶴松蘿本自伴，別書素琴醉。去經宵枕，衰髮寒來白。
日抵故園多年歸，未遂因逢此地憶。吾廬

再赴召辭歸

陳搏

十年踪跡踏紅塵，為憶青山入夢頻。紫陌縱榮爭及
睡朱門，雖貴不如貧。愁聞劔戟扶危主，悶聽笙歌聒
醉人。携取舊書歸舊隱，野花啼鳥一般春。

贈華山隱者

袁掬

黑髮祠官佩水蒼，萬松深處響琳琅。黃巾有法能為
涌紫木無饑，可代糧。招鶴舞空山，月冷撒龍吟雨海。

風涼瑤池飲同長生訣
碧澗研朱寫綠章

題華山太古雪贈人

盧 亘

往時天大風能吹華山裂
墜此一拳石咸云太古雪
粵自開闢初雲氣所凝結
已經六萬歲變化同截案
望之色正白表裏共澄徹
塵土不能浣光彩耀日月
願君勿愛此特以獻金闕
回中避暑時可用消毒熱

石仙人洞

王 履

隱在南峯背如嫌世俗知
偶從青蔭裏微見白光垂
飛濺隨風遠琮琤上谷遲
衆仙間出洞可有在釣時

西峯絕頂

楊慎

五星墮地爲五岳金虎西南動芒角踐華爲城額削
成云是巨靈之手斲三條鼎立當中央直與鴻濛奠
清濁太一終南培塿開洪河清渭繞行杯日華先照
蓮花上雲氣常從仙掌表高穿箭括通天路俯瞰明
星玉女臺冷然風馭不可駐降望大壑令心哀

宿玉井樓

李攀龍

不寐芙蓉冷幽棲薜荔驚靈胡秋蟲蝨毛女夜妖精
暗穴龍蛇走深林虎豹耕星連碁石布雨共洗盆傾

霜絕千尋鎖風邀五舌笙豈因臨帝座呼吸變陰精

灝靈樓

許宗魯

晚風春寂寂古廟拓森森立馬千山夕登樓萬里心
厓寒留積雪風暖散輕陰欲訪長眠叟其如虎豹林

望岳

劉曰林

西極高臨太華峯金天削出翠芙蓉蒼龍倒挂千山
雨石馬長嘶萬壑風日射井蓮仙掌巖雲壑瀑布玉
泉通衆鸞便欲凌煙霧絳節霏微白帝宮

文

酈道元一段

華岳本一山當河河水過而曲行河神巨靈手盪脚
踴開而爲兩今掌足之跡仍存華岳開山圖曰有巨
靈胡者偏得神元之道能造山川出河所謂巨靈
首冠靈山者也常有好事之人故升華岳而觀厥
跡焉自下廟歷列栢南行十一里東迴三里至中祠
又西南出五里至南祠謂之北君祠諸欲登山者至
此皆祈請焉從北南入谷七里又屆一祠謂之石養
父母石龕木主存焉入南出一里至天井井栽容人

穴空迂迴傾曲而上可高六丈餘山上又有微涓細
水流入井中亦不甚沾人上者皆所由涉更無別路
欲出井望空視明如在室窺窻也出井東南行二里
峻坂斗上斗下降此坂二里許又復東上百丈崖升
降皆須扳繩挽葛而行矣南上四里路到石壁緣傍
稍進徑一百餘步自此西南出六里又至一神名曰
胡趨寺神像有童子之容從祠南歷夾嶺廣載三尺
餘兩箱崖數萬仞窺不見底祀祠有感則雲與之平
也然後敢度猶須騎嶺抽身漸以就進故世謂斯嶺

爲擗巖矣度此二里復屆山頂上方七里靈泉二所
一名浦池西流注於澗一名太上泉東注澗下上宮
神廟近東北隅其中塞竇禱物事難詳載自上宮東
北出四百五十步有屈巖東南望巨靈手跡唯見洪
崖赤壁而已都無山下上觀之分均矣河在關內南
流潼激關山因謂之潼關灌水注之水出松果之上
北流徑通谷世亦謂之通谷水東北注於河述征記
所謂潼谷水者也或說因水以名地也河水自潼關
東北流水側有長坂謂之黃巷坂傍絕澗涉此坂以

升潼關所謂汧黃巷以濟潼關矣歷北出東端通謂
之函谷關也邃岸天高空谷幽深洞道之峽車不方
軌號曰天嶮

張說一段

西岳太華山者當少陰用事萬物生華故曰華山踞
中土西徧當七官正位是稱西岳披圖以察削成而
四方立表以筭其高五千仞石壁磔豎而雄竦衆山
奔走而傾附其氣肅其勢威其行配金其辰直西前
對華陽之國後壓華陰之郡左抱桃林之塞右產藍

田之玉諒少昊之下都卽蓐收之別館也

樊穀二段

祭視三公者以其能興雲雨產萬物通精氣有益於人則祀之

其德休明則有禎祥荒淫臊穢篤災必降秦違其典
璧遺鄠池二世以亡高祖應運禮遵陶唐祭則獲福
奕世克昌亡新滔逆鬼神不享建武之初芻掃頑凶
更率舊章敢用玄牡牲牷必克天惟醇祐萬國以康

李靖一段

興雲致雨天實肯從轉孽為祥何有不賴

郭綠生二段

山下自華岳廟列柏南行十一里又東廻三里至中祠又西南出五里至南祠南入谷口七里又至一祠又南一里至天井出井如望空視明如在室窺窓出井東南二里至峻坂斗上又東至青柯坪則僕馬皆屏去無用上百丈崖皆須攀繩挽葛而後行今有石磴鐵索攀緣而上其石磴止容一人縉紳欲登必須著布鞋窄袖短衣仍以帶索束縛躡磴攀索而上或

膽氣不足而心多懼者登或可勉下則驚心褫氣實
難故韓愈旣登此山及下時視其險絕遂心悸目眩
發狂痛哭投書與家人永訣華陰令乃百計取之然
後能下蓋如井綆汲水束縛而下垂之也其難下可
知

後漢張旭華岳碑序云山莫尊于岳岳有五而華處
其一人主慶興必有其應故岱山石立中宗繼統太
華授璧秦胡絕緒布五方則受其西列三條則居其
中經有望秩之禮典有生殖之祀蓋所以宗山川而

報功也

王履一段

生太華之方由太華之側古及今安知幾許然愛焉者亦每以艱險自畫而不之遂雖少陵抱藉關中亦望焉而止耳天下奇絕處固有係乎緣之偶不偶也却說謂山竹洗盡五年塵土腸胃吾塵土五十年不意中得此雖遘一遺十而秀拔之神雄特之觀亦足以暢夫一生之拳跼矣

文翔鳳一段

明日至西岳灝靈樓望三峯尊嚴酷似尼父司寇冠
子雲所謂太華爲旒莊子所謂朱鉞尹文作爲華山
之冠以自表然則仙人掌其彈冠者也

都穆一段

昔之人謂鳥聲不上青柯坪非以其無食亦以高寒
而然也

李攀龍一段

攀龍曰余旣達削成四方中不復知天不可升矣余
夫善載腐肉朽骨者乎及俯三峰望中原見黃河從

塞外來下窺大壑精氣之所出入又未嘗不奕然自失也

袁宏道一段

千尺嶮而上大奇則大嶮小奇則小嶮寸寸焉如弱夫之挽勁弩至蒼龍巖千仞一脊仄仄如蛻龍之骨四而峰巒映帶秀不可狀遊者至此如以片板浮顛浪中不復謀目矣然其奇可直一死也

楊嗣昌一段

昔昌黎痛哭非為紕漏蓋山水奇窮筆所不能繪脉

所不能傳惟有痛哭足以發舒其勝耳不然嗣宗之
達猶不免哭况昌黎耶

尹仲二段

峰頂有二十八潭而經見者四俱澄鮮可鑒在南者
曰仰天池曰黑龍潭在東者曰玉女洗頭盆在西峰
下者曰玉井即生十丈蓮處遊者坐此如處堂與之
中四面井幹飛翼斷續攢映窺之不見扣之無聲一
區自為天地者也

大凡名山多為黃冠緇流所據而此輩亦借遊客以

厚其生華山不然寄寓洗心坪者獨道士李太和耳
嚮道之難可知也余窮兩日之力僅得盡三峰大觀
若夫秘龕邃壑十未能二三也圖記侈嶮峽之險甚
具遊人一見氣奪以予觀之此中即蹈亦不死蓋鐫
處積土相疊勢必留滯懸布挽綆皆贅也同調者法
昌黎而壯謫仙

王涯一跋

西嶽太華華之首峯有五岩北壑破岩而列自下遠
而望之偶為掌形旧俗土記之傳者皆曰昔河自積

石出而西流既越龍門遂弭南馳者千數百里折波
左旋將東溟連山塞之壅不得去有巨靈於此力擘
而剖其中踞而北者為首陽絕而南者為太華河自
此洩莽洋下馳故其掌跡猶存巨靈之跡也余聞惑
之乃往觀曰誕哉此說乎夫所謂神者非人也其動
無聲其行無跡若形而無象若氣而無色拔山剖澤
而不見其作鼓風奔水而不見其力視不可察名不
能及故推而謂之神苟有聲形可聞見非神之所為
則非人力之所能及也烏有神之作力而有人跡乎

且夫高天厚地，聳山流川者，神之所為也。所言開山導河亦神也。神之所以神者，有作而無悖，一成而不易，烏有始塞而後達之始，連而後絕之始，不知終是不為神矣。且此壅之運為何古乎？在太初開闢之始乎？為陶唐洪水懷山襄陵之際乎？以為開闢之始也，宜當胚澤之先，天地未位，萬象茫昧，尚無定歸，當止一河之壅抑，而一壅與其道，借有其事，自為而著，悠悠乎年代之耿沒，其誰也？克傳以為陶唐洪水之際乎？則禹奠百川，宜在禹貢，乃曰導河積石，至於龍門。

南至於華陰東至於底柱皆禹功之所致以達于海
豈天地之大異若此典記不以為文哉天設四瀆宜
有以通不當始遏其流滯挽其和氣及其汨亂而後
理也且山谷之作此形何則不有嶠岵相薄高深相
敵乃有銳而出者為虎牙偶而背者為熊耳角而嶮
者為牛首冠而峭者為雞頭必以形之類形而必加
說則雞牛熊虎之象其亦有作乎余嘗覽張平子賦
西京至巨靈高掌厥跡猶存之辭以為駭聞精達常
以是惑使不語怪神之旨何所述明暨觀其形而皆

之果謬悠而無據也將假文神事以飾其辭歟為思
而有闕歟因辯其由而述之以告山下

華之雜記

山海經二段

華之首曰錢來之山其上多松其下多洗石有獸焉其狀如羊而馬尾名曰羝羊其脂可以已暗

太華之山鳥獸莫居有蛇焉名曰肥螭六足四翼見則天下大旱

韓子一段

秦昭王令工施鈎梯而上華山以松栢之心為樽前長八尺棊長八寸而勒之曰昭王嘗與天神博於此

禁作綦飛

史記一段

秦始皇三十六年使者從閼東夜過華陰半舒道有人持壁遮使者曰為吾遺高池君因言曰今年祖龍死使者問其故因忽不見置其璧去使者奉璧具以聞始皇使御府視壁乃二十八年渡江所沉璧也

崔鴻前燕錄一段

王猛隱華山桓溫入閼猛被褐而詣之一面說當代之事捫蝨而言傍若無人

白孔六帖一段

唐玄宗車駕次華陰山見岳神數里迎謁遂召諸巫
問神安在獨老巫阿馬婆云在路左朱鬢紫衣迎候
陛下上顧笑上至廟又見神紫韃俯伏庭東南大栢
樹下召阿馬婆復問對門上見上加禮敬詔封西岳
為金天王

逸史一段

玄宗親幸西岳禮畢東行出廟門巫者奏曰金天王
帶甲持戈步行引駕詔擇駿馬壯士為御巫贊曰金

天王拜謝行數里馬汗不可進凡十易馬至關而止
巫云金天王辭回

賈氏談錄一段

玄宗御製金天王廟碑廣嗣初其石忽自鳴隱隱然
聲聞數里決旬而後定明年黃巢犯關其廟為賊火
所焚隳其門觀

雍大記一段

歐陽修華山題名跋云自唐開元二十三年訖後唐
泰清二年實二百年題名者五百一人再題者又三

十人錄為十奏往往當時知名士也或兄弟同遊或
子侄並侍或僚屬將佐咸在或山人處士相攜或奉
使奔命有行役之勞或窮高望遠極登臨之適其雷
貴貧賤歡樂憂悲非惟人事百端而亦世變多故開
元二十三年歲在丙午是歲天子耕藉田肆大赦群
臣方頌太平請封禪蓋有唐極盛之時也清泰二年
歲在乙未廢帝篡立之明年也是歲石敬瑭以太原
反召契丹入自鴈門廢帝自焚於洛陽而晉高祖入
自太原五代極亂之時也始終二百年間或治或亂

或盛或衰往者來者先者後者雖窮通壽夭參差不齊而五百人者卒臨於共盡其姓名歲月風霜剝裂亦或存或亡其存者有千仞山石爾故特錄題刻撫奏慨然何異臨長川而嘆逝也

名勝志一段

西事珥云華陰有鳳居山唐開元間鳳逐二龍至此龍墮地化清泉二道鳳憤而死僧以石函其骨瘞之山巔累石為塔覆之我景泰間鄉民收甓石築城函遂露啓函鳳胫骨長二尺股骨長一尺五寸其色如

玉

岳志四段

華山之頂天真常現靈異先聞異香次觀瑞靄或千
乘萬騎或玉女金童或丫髻童子數百或羽服道士
踰千或珠幢金繖或絳節霓旌或騎龍虎或乘鳳鸞
或金光滿地或火焰連天或紫霧騰空或祥雲覆頂
或在最高峯山或於仙掌峰頭又大羅峯上王母數
見或衣黃裳戴金冠乘寶輦駕五色班龍九頭上有
羽蓋左右仙官將吏莫窮其數後因建王母祠堂以

祀之

玉女石馬神靈異常夜聞嘶嗽之聲頂上隱者常見之

白羊峯每至三元八節及諸齋日即有神燈或三或五見于巖壁

希夷避詔後火到人間一日遊華陰華陰令王睦問曰先生居溪巖寢止何室出使何人守之希夷口占一絕云華山高處是吾宮出即凌空跨曉風臺榭不將金鎖閉來時自有白雲封

卷四終